

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

- एनआईए नै जंदे रोज जम्मू च 12 थाहरें उप्पर छापे मारियै आतंकवादी नेटवर्क कन्नै जुड़े दा ऐतराज-जोग समेयान जब्त कीता ऐ।
- जम्मू-कश्मीर सरकारै बक्ख-बक्ख मैह्कमें च कम्म करै करदे कैजुअल वर्करें ते ध्याड़ीदारें गी पक्का करने दी मंग पर अगड़ी कार्रवाई लेई मुख् सचिव हुंदी प्रधानता तैह्त् 6एं मैम्बरें आहली इक कमेटी खडेरी ऐ।
- मंत्री सकीना इत्तू होरें आखेआ ऐ जे सरकार, दबोए-लतड़ोए दे लोकें गी उबड़ा चुक्कने लेई वचनबद्ध ऐ।
- एलजी मनोज सिन्हा होरें भारत गी 5 ट्रिलियन डॉलरें दी अर्थबवस्था बनाने ते विकसित भारत दा लक्ष्य हासल करने लेई पंचैत ते उद्योगें बश्कार तगड़ी सांझ-भ्याली दी जरूरतै उप्पर जोर पाया ऐ।
- मुख् सचिव अटल डुल्लु होरें जम्मू-कश्मीर च जल शक्ति अभियान दे तैह्त् पानी दी सांभ-संभाल सरबंधी जतनें दा इक बैठक दरान जायजा लैता।

<><><><><><>

NIA Jammu Searches

राष्ट्री जांच एजेंसी — एनआईए नै कल जम्मू च 12 थाहरें उप्पर छापे मारे। एह छापे लश्करे तैयबा ते जैशे-मोहम्मद ज्नेय आतंकवादी गुटें कन्नै जुड़े दे संगठनें ते गिरोहें लेई कम्म करने आहले ओवरग्राउंड वर्करें दे घरें पर मारे गे न। इस दरान एजेंसी नै केई सारा ऐतराज-जोग समेयान जब्त कीता। बन्ने पारा थमां आतंकवादिएं दी इस बक्खी घुसपैठ दे सरबंधै च थहोई दी खूफिया जानकारीएं दी बिनाह उप्पर छापेमारी आहली इस कार्रवाई गी अंजाम दित्ता गेआ।

<><><><><><>

Panel Regularization

जम्मू-कश्मीर सरकारै बक्ख-बक्ख मैह्कमें च कम्म करै करदे कैजुअल वर्करें ते ध्याड़ीदारें गी पक्का करने दी मंग पर अगड़ी कार्रवाई लेई मुख् सचिव हुंदी प्रधानता तैह्त् 6एं मैम्बरें आहली इक कमेटी खडेरी ऐ।

एह पैनल, पिच्छले केइएँ ब'रें थमां बक्ख-बक्ख मैहकमें च आरजी तौर पर कम्म करै करदे वर्करें दे सेवा सरबंधी मामलें दी व्यापक जांच करोग। एह पैनल इस सरबंधै च उचित हीलें दी सफारश करोग ते अपनी रिपोर्ट सरकार गी सौंपग।

<><><><><><>

Sakina Social Welfare

समाज कल्याण मंत्री सकीना इत्तू होरें आखेआ ऐ जे सरकार जम्मू कश्मीर दे दबोए-लतड़ोए दे लोकें दे उत्थान आस्तै वचनबद्ध ऐ। विधानसभा च विधायक निजातुद्दीन भट्ट हुंदे सुआलै दा परता दिंदे होई मंत्री इत्तू होरें जम्मू कश्मीर च गरीबें, दिव्यांगें, बुर्जुगें ते कसरी लोकें आस्तै बक्ख-बक्ख कल्याणकारी योजनाएं पर लोह पाई। इनें योजनाएं च इंदिरा गांधी राश्ट्री वृद्धावस्था पेंशन योजना विधवा पेंशन योजना, दिव्यांग पेंशन योजना दे अलावा होर योजनां बी शामिल न। मंत्री होरें विधायकें गी बक्ख-बक्ख योजनाएं आस्तै पात्रता दे कन्नो कन्नी ऑनलाइन आवेदन प्रक्रिया लेई लोकें गी जागरूक बनाने लेई बी आखेआ।

<><><><><><>

Sakeena Professors

उच्च शिक्षा मैहकमे दिएं मंत्री सकीना इत्तू होरें ऐलान कीता ऐ जे युनिवर्सिटी प्रोफेसरें दे सेवानिवृत्त होने दी उम्र गी 62एं ब'रें थमां बधाइयै 65 ब'रे करी दित्ता गेआ ऐ। एह फैसला मुख सचिव हुंदी प्रधानता आहली इक जायजा कमेटी दिएं सफारशें मगरा लैता गेआ ऐ। जारी हुकमै मूजब, सेवा काल च विस्तार, मेरिट दी बिनाह उपपर दित्ता जाहग। एह प्रक्रिया कुसै बी किस्मै दे पक्ख-पात ते फर्कोफर्की गी रोकने दे कन्नो-कन्नी तय पैमाने दे मूजब तोढ़ चाढ़ी जाहग। एह फैसला राश्ट्री शिक्षा नीति दी जम्मू-कश्मीर च अमल-आवरी दे मूजब लैता गेआ ऐ।

<><><><><><>

TB Campaign Doda

डोडा जिले च टीबी दे खात्मे सरबंधी अभियान लगातार रफतार फगड़दा जा करदा ऐ। इस सरबंधै च जिला सेहत सोसायटी डोडा आसेआ टीबी दे मरीजें गी सेहत दिक्खभाल ते खाने-पीने आहलिएं जरूरी चीजें दी सप्लाई जकीनी बनाई जा'रदी ऐ। रेड क्रॉस आहली पैहलकदमी दे तैहत, टीबी दी मारै हेठ आए दे 7 मरीजें गी खाने-पीने दा समेयान बंडडेआ गेआ।

डोडा दे डिप्टी कमिशनर हरविंदर सिंह होरें जिले च जारी अभियान उपर लोऽ पाई ते दस्सेआ जे 65 नमें मामले सामने आए हे जिंदे चा 25 जने इस बमारी शा ठीक होई गे न। उ'नें गलाया जे डोडा जिले गी टीबी-मुक्त बनाने दे मकसद कन्नै उत्थे सेहत जांच आहले जतनें ते जागरूकता कार्यक्रमें च बाददा कीता गेआ ऐ।

<><><><><><>

LG Edge 2025

लेफ्टिनेंट गवर्नर मनोज सिन्हा होरें कानपुर च विकसित भारत संवाद – EDGE 2025 च हिस्सा लैता ते सिविल समाज दे सदस्यें ते उद्योगें आहले खेत्तर कन्नै जुड़े दे सरबंघत धड़ें गी गुजारिश कीती जे ओह 2026 तगर भारत गी 5 ट्रिलियन डॉलरें दी अर्थबवस्था बनाने ते 2047 तगर भारत गी विकसित राष्ट्र बनाने दे मकसद कन्नै कम्म करन। आलमी सतह उपर मजदूद आर्थिक चुनौतिएं पर लोऽ पांदे होई एलजी होरें भारत गी माल तैयार करने आहला इक बड़डा गढ़ बनाने दी जरूरतै उपर जोर पाया। श्री सिन्हा होरें पंचैतें ते उद्योगें बशकार तगड़ी सांझ-भ्याली दी हिमायत करदे होई ग्रामीण ढांचे, सेहत दिक्खभाल संविधाएं, शिक्षा ते आर्थिक मौकें च बाददा करने लेई बी आखेआ। उ'नें बड़डे कारोबारिणें गी आखेआ जे ओह ग्रामीण सतह उपर उद्यमों गी बढ़ावा देन ते भारत दे नौजवानें ते नमिणें काहड़ें सरबंधी समर्थ दा लाह ठोआंदे होई टिकाउ ते समग्र विकास दी दिशा च कम्म करन।

<><><><><><>

CS Jal Shakti

मुख्य सचिव अटल डुल्लु होरें जम्मू-कश्मीर च जल शक्ति अभियान दे तैहत पानी दी सांभ-संभाल सरबंधी जतनें दा कल इक बैठक दरान जायजा लैता। उ'नें डिप्टी कमिशनरें गी निर्देश दित्ते जे ओह एमजी-नरेगा ते कैम्पा ज्नेही योजनाएं दे मूजब गै, जिला जल संरक्षण योजना गी तैयार करोआन। एहदे अलावा उ'नें पानी सरबंधी साधनें-स्रोतें दी जीआईएस मैपिंग ते जियो-टैगिंग दी जरूरतै पर बी जोर पाया। मुख्य सचिव होरें हर इक ग्रांऽ च जिमीं हेठ मजदूद पानी दे स्तर गी उबड़ा चुक्कने सने सभ्मनें स्कूलें ते आंगनवाड़ी केन्द्रें च बरखा दे पानी दी सांभ-संभाल सरबंधी प्रणालियां स्थापित करने दे बी निर्देश जारी कीते। उ'नें सरबंघत अधिकारिणें गी इब्बी आखेआ जे ओह औंदी 22 मार्च गी मनाए जाने आहले पानी सरबंधी कुल संसारी ध्याड़े दे मौके उपर हर इक पंचैत च जल शपथ आहले कार्यक्रमें दे आयोजन च बद्धोबद्ध लोकें दी शमूलियत जकीनी बनान। एहदे अलावा उ'नें औंदी पैहली मई थमां 7 मई तगर जल स्रोतें दी साफ-सफाई आहला इक विशेष अभियान चलाने दे बी निर्देश दित्ते।

<><><><><><>

Kathua Waterfront

कठुआ दे डिप्टी कमिशनर राकेश मिन्हास होरें कल इक संवाददाता सम्मेलन दरान कठुआ वाटर फ्रंट योजना शुरु करने दा ऐलान कीता। इस मौके उप्पर मीडिया गी जानकारी दिं'दे होई डिप्टी कमिशनर होरें कठुआ आहली नैहर गी, मनोरंजन ते रोजगार सरबंधी इक प्रमुख केन्द्र च तब्दील करने दे प्रशासन दे नजरिये उप्पर लोऽ पाई ते आखेआ जे एहदे'नै जिले दे विकास दा इक नमां ध्याऽ शुरु होग। इस मौके उप्पर बोलदे होई डिप्टी कमिशनर राकेश मिन्हास होरें आखेआ

<><><><><><>

Mushroom Tour

राई-बाई सरबंधी टिकाउ ते नमें तौर-तरीकें गी बढ़ावा देने दी इक महत्वपूर्ण पैहलकदमी दे तैहत चनैनी हलके थमां खुंभें दी रड़ करने आहले 110 करसानें गी स्कॉस्ट जम्मू दे इक ध्याड़े दे दौरे पर रवाना कीता गेआ। चनैनी दे विधायक बलवंत सिंह मनकोटिया ते मुख् कृषि अधिकारी संजय आनंद होरें करसानें दे इस दल गी झंडी दस्सियै रवाना करोआया। दौरे दरान इ'नें करसानें ते उद्यमिएं गी खुंभें दी रड़ मतल्लक बक्ख-बक्ख तकनीकें बारै जानकारी हासल होई। इस सरबंधै च बोलदे होई चनैनी थमां विधायक बलवंत सिंह मनकोटिया होरें आखेआ

<><><><><><>